



Sezoen 2013 -2014 nó: 3



## Glöckzelig nuujaor en al waat wunsjelic is.

Sjtadsprins Paul II, Vorst Marot Harie I en de Wieze Raod van De Marotte Zitterd wunsje uch ein sjitterend 2014 en veural vööl gelök en gezóndjheid. Veer haope uch in dit jubbelei-sezoen dèks te mage zeen en uch te mage verammeseiere mit ein geweldig vastelaovespregram.



Bekèndmaking nuuje Ridder en 83e sjtadsprins

## Oetruipingsavond mit verrasjinge

Op zaoterdig 4 jannewari om 20.30 oere vèndj in het Forum theater de Oetruipingsavond plaatsj. 't Belaof eine gezellige avond te waere mit lach, zangk, sjpanning en verrasjinge. Dit alles ónger 't jubbelei-motto 'Zitterd dreet door'.

De Oetruipingsavond sjteit tradisjeneel in 't teike van twee offesjeel momènte. Aan 't begin van de zitting zal bekènd waere gemaak wae de nuuje Ridder in de orde van De Pappegey wurd. Dees óngersjeijing wurt jaorliks verleend aan eine persoon dae vööl veur de Zittesje vastelaovend beteikent. Aan 't ènj van de Zitting zal Vorst Marot 't tillegram van de Pappegey veurlaeze en dan wurd bekènd wae de 83e sjtadsprins en jubbeleiprins wurd.



Tössje dees offesjeel momènte is d'r vööl te lache. Mèr leifs driemaal zal de buut besjtege waere door buuttekampioen 2013 Fer Naus, Chrit Driessen en Ger Frenken, de 5-voudig rekaor buuttekampioen. Dao naevebie is d'r vööl 'Zittesje' meziek en ein paar verrasjinge. De muzikale omliesting is in henj van de Marottekapel.

Rondj middernach sjtaon alle gegaeves van de nuuje sjtadsprins oppe website [www.marotte.nl](http://www.marotte.nl). Vanaaf Zóndig kènt geer oppe website zelf 't Tillegram van de Pappegey' downloaden.

Kaarte zeen te koup bie de Marottewinkel (damesmode Van Neer Eijckeler, Brandjstraot 11-15) en via de website.

## Jubbelei-kunswerk geprizzenteierd



Sjus wie bie de lèste twee jubbelei, is d'r ouch ditmaal weier ein blievende 'herinnering' aan 't 12 x 11-jubbelei te verkiege. Dit kunswerk door de kunstenaesj Marcel Boonen en Miel Frissen is gemaak ónger 't jubbel-motto 'Zitterd dreet door'.

Het is gemaak van obbenuuts gebroek metaal en glaas. Mit de bedoeling om 't meer te laote oetsjtraole dan Vastelaovend allein.

't Is verkriegbaar bie de Marottewinkel en via de webshop. De pries is € 132,- (12 x € 11,-). En d'r waere d'r maksimaal 12 x 11-sjtöks van gemaak.



## Kaarte Jubbelei-weekend noe te koup

Van vriedig 31 jannewari pès zóndig 2 fibberwari hawte de jubbeleierende Marotte hun Jubbelei-weekend in de Sjtadssjportal.

Vriedigaovend wurd aafgetrap mit eine **Vastelaovesproms** mit de Phil en de Sint Joep. Zie kriege hiebie mitwirking van o.a. Beppy Kraft en Frans Pollux (Neet oet Lottum). Meer infermase: <http://www.marotte.nl/marotte-proms/> Veer wieze d'r op dat de **Vastelaovesproms** ein zittend evenemènt is aan lang taofele.



Zaoterdigmiddig is 't vanaaf 13.00 oer de beurt aan de Kènjer mit **Telekids Disco**.

's Aoves is d'r dan eine richtige Kòlsje aovend ónger 't motto; **Kòlsje Teun, Zitterd dreet door**. Meer infermase: <http://www.marotte.nl/kolsje-teun-zitterd-dreet-door/> . Veer wieze d'r op dat de **Kòlsje Teun, Zitterd dreet door** ein sjtaond evenemènt is, mit allein stehtische in de zaal.

's Zóndigs vanaaf 13.00 oer wurd aafgesjlaote mit **Vastelaovend same!** Eine Vastelaoveskirmes veur jóngk en awd en de Marotte Jubbelei-resepe.

Kaarte zeen te kriege;

- Digitaal via Tixx, zee hievoor de link oppe website [www.marotte.nl](http://www.marotte.nl) ,
- In de Marottewinkel, Fotografie Ton Dirx (Paesjsjtraot), Hendriks Mode (Riekswaeg Noord), Segaremagazien Augustus Van Neer (houk Mert/Lömmerichersjtraot), Benzienpómp Beurgens (Dr. Nolenslaan en Hasseltsebaan)




## Nuuje Website Optoch Kommitee Zitterd

De gans vernuuje website van 't Optoch Kommitee Zitterd geit ein van dees daag de loch in. Het nuut ontwirp geef alle ruimte óm 't nuuts, alle infermase en de vraoge rondjóm de Zittesje Optochte mekkelik te kènne trókvènje.

't Webadres blif geliek: [www.optoch.nl](http://www.optoch.nl) (zónger t)

En veer vraoge uch de kómmende tied dao ens get dèkser op te kiekie went d'r is bès waal ens get nuuts te vermeldje.



## Peter Wilms; nuut besjtuurslid Marottesenaat

D'n heer Peter Wilms is benuimp pès nuut besjtuurslid van de Marottesenaat. Peter zal de funksie van sjatmeister gaon euvernumme van Ger Heilkens, dae dees taak in de veurjaorsvergadering zal neierlègke.

Ger haet de taak van sjatmeister ruum 12 jaor (vanaaf 20 november 2001) langk oetgeofend.

Veer wille Ger naames de ganse Marotte-perpluu danke veur ziene inzat, En veer wunsje Peter vööl sukses mit zien nuuj taak.

## Veurbereijing Gala PrinseBal loupe op volle toere

Es 't goud is, kriege de bezuikesj van 't Gala Prinsebal, in de kómmende daag de oetneudiging veur 't kómmend bal toes. Oppe foto hiejnaeve zuut geer dat de Auw Prinse die aafgeloupe waek zelf inein geknutseld hóbbe.

Het Gala Prinsebal wurd dit jaor gehawte op zaoterdig 15 fibberwari in de Sjouwborg. 't Thema wie in de lèste nuutsbreif besjpraake is; Riddesj en Jónkvrouwe. D'n all-in pries is € 77,- De veurverkoup is en de kedoobónne zeen verkriegbaar bie Brasserie Eigewies in de Meulebaeksjtraot en in de Marottewinkel. Meer infermase: [www.galabal.nl](http://www.galabal.nl)



Meer infermase: [www.marotte.nl](http://www.marotte.nl)

 <http://www.facebook.com/DeMarotteZitterd>

 [http://twitter.com/marotte\\_zitterd](http://twitter.com/marotte_zitterd)